

Kolosi

Agau e nugau zebigeg

Yesus go koli Mesgai wag simai darena, wai 32 mazicina, Pol agau go sikut weun. Pol go getal Kolosi uzan Uwait nugau Ze duail el abai marab tam, Epapras nug uzan go duail el Uwait nugau Ze abai mareun. Ziwas go ebu, Pol go Rom ban uzan, hiacaranem zau oug dareun. Guzenina, Epapras go Pol piabun beteun. Go Pol guzenai aureun, “Kolosi uzan polumanemen dudu ipal agen Kristen duail el guzenai awarai darem, ‘Uwait nug isanarabun go igul e unum sesamoramam, agal enimag galau kuatamam, ag ee ipal i zimamen, ag igul go unum sesamorebi, Uwait nug isanaramau. Yesus Kristus go Uwait sul tam. Go gonugau nag tam, go gaul tibur ipal darem sul.’ Polumanemen dudu go agen guzenai ananem.”

Pol go ze go doimai, Kolosi duail el koli guzenai sikut wai mareun, “Agal ze go petak tam. Ag dudu goagal ze i duan, Yesus Kristus nug petak duail el emgasag unum isanareun. Agal oiagab go en petak ebi, gonug isanaramau.” Tikikus go Onesimus dual agau go oi betei Kolosi duail el maremen.

Agau e sesamorabun en ze

1:1-8 Pol nug Kolosi duail el oiagab selai mui dabun ze awareun.

1:9–2:19 Kristus go du eru neneg, gonugau salau erunai meun ze Pol nug Kolosi duail el awareun.

2:20–4:6 Kristus dual awau dabun igul.

4:7-18 Pol nug Kolosi duail el ‘Kero’ awaraimai, gonugau ze poeun.

1 ¹Iz Pol, Uwait nug gonugau dabeleu eiman iz Kristus nugau ze oi aidabun du tapai mileun. Igual zaicig, Timoti, go iz ibail ereg iguan ag sikut wai marem.

²Iguan ag igual zaiger, Kristen duail el Kolosi uzan daremen agal oiagab Kristus en petak emen sikut wai marem. Igual memenig, Uwait nug gonugau ougab naliu eiman ag isanaraimai, agal oiagab selai dabun maramau.

Kolosi duail el agal oiagab Yesus en petak emenin.

³Ig Uwait auranem ziwas ebu, ig ag en umkoskos Uwait ‘Ese-e’ auranem. Uwait go igual Dubanou Ban, Yesus Kristus nugau memeg.

⁴Ig Uwait 'Ese-e' auranem, einen, ig agal ze guzenai domun ag Yesus Kristus en agal oiagab petak emen gusig usaleun. Agen Kristen duailen ag en unum oiagab nug noumamau. ⁵Amegai Uwait nugau Ze Naliupet ag ebalagab alaba, ag petak ze go doimai, ein ece aiu ses Mesgai wag dareu wabun gumei dacanemen, gonun, agal oiagab Yesus Kristus en petak aimai, gonugau duailen en oiagab nug noumamau. ⁶Em gasag unum duailen ag Uwait nugau Ze Naliupet doimai, agal oiagab petak aimai, gonugau igul naliu suban sesamoranemen sul ag Kolosi duailen han igul go guzenanemen. Ze go tutak amegai ag waiagab alina, ag petak ze go doimai, Uwait gonugau ougab naliu eiman ag isanaraneu igul ag abe memenin. ⁷Epapras nug ze go abai marena, ag abe memenin. Epapras go igual salau zaicig, ig go en oigeb nug noumanem. Gonug ag isanarabun en Kristus nugau salau suban macaneu. ⁸Go ig waigeb alaimai, ag Kristen duailen en oiagab nug noumamau igul go Uwait nugau Ah Wes nug ag mareun go ze go ig aigeun.

⁹Ig amegai ze go doimai, ziwas go ebutal, go gonugun Uwait nug ag isanarabun en auranem. Ig umkoskos Uwait auremun, gonugau dabeleu naliu go nugtal ag maramau, gonun, ag gonugau dabeleu abiu mebi, Uwait nugau Ah Wes nugtal ag dabeleu naliu asiu maramau. ¹⁰Gonun, ig koli Uwait auremun, ag Dubanou Ban nugau duailen tuguiai pet igul naliu tutak sesamorebi, gonugau ougab ag ebalagab umkoskos siksikai mui damau. Agal daremen igul go naliu daimai, salau naliu mina, duailen ipal agen agal igul uligaraimai, sesamoramam. Ag igul go en guzenaimai, Uwait nug go suban abe mamamen. ¹¹Uwait nugtal gonugau gusig banou sil ag gusig maramau. Gonug ag gusig maraba, ag ebalagab ein uhu zuba, ag gusig tapai damamen. Guzenaba, ag oiagab iau daimai, agal oiagab siksikai mui damamen. ¹²Guzenaimai, ag oiagab siksikai mui igual memenig 'Ese-e' auramamen. Gonug ag Uwait nugau duailen ipal abai ereg gonugau al ebu daimai, gonugau ece wabun tapai mareun. Ag ece go ereg umamen. ¹³Uwait nug ig umus nugau gusig ougan imaigeimai, gonugau nag en ougab nug noumaneu gonugau piu dabun migeun. Guzenina, gonugau nag nug ig gumiganeu. ¹⁴Uwait nugau nag nug ig umut ougan gau migeimai, gonug igual igul eg unum zilagai migeun.

Pol nug Kristus nugau igul en, gonugau salau mui, en aneun.

¹⁵Du tub nug Uwait piabun iborain tam. Kristus go Uwait nugau dorog sul. Uwait nug ecesab unum usalai meun, gonugau nag kaman nug ecesab go unum zilareu. Ag unum gonugau piu dacanemen. ¹⁶Kristus nugau gusig ebu ecesab Mesgai wag darem, em ebu darem, go unum usalai meun. Gonug ecesab ig uligaranem mui, ece ig i uligaranem mui usalai meun. Gonug em e eban gumaraneu dudu banban mui, tibur inain mui, wes ipal gusig mui ereg, ecesab unum wanimag mui unum usalai meun.

Ecesab go gonugau salau murabun Kristus nugtal usalai meun. ¹⁷Kristus go darena ebu, ecesab go unum usalemen. Ecesab go gonugau gusig ebu dacanemun. ¹⁸Gonug Uwait nugau duailen unum gumaraneu. Duailen ag gonugau enib sul. Go agal gagaliag sul. Nugtal amegai dareun. Gonugtal noumimai, amegai koli waseun. Ecesab unum gonugau piu dabun guzeneun. ¹⁹Uwait nug ougab siksikai mui gonugau dabeleu eim gonugau nag unum nug sul dabun tapai moroun. ²⁰Getal ecesab unum Uwait nugau iwai zaugul usalemen, bo, Kristus go a gegeulanau ebu noumina, gonugau eseu esikina, Uwait nug koli ece go abai zaiareun. Ece em ebu darem mui, Mesgai wag darem mui, koli nug dual iau dabun usalareun.

²¹Ag Kolosi duailen, getal, ag Uwait semuranemen. Ag dabeleu eg mui, gonun, ag igul eg macanemen. Gonun, igul go nug ag Uwait dual iwai macanemen. ²²Bo, Kristus go em ebu daimai, noumeun, gonun, Uwait nug ag koli gonugau zaugul usalai marena, Kristus nug Uwait nugau ameg ebu ag duailen naliu Uwait nug sul dabun gotulareun. Gonun, ag gonugau ameg ebu ze tamacag. ²³Ag Uwait nugau Ze Naliupet doimai, agal oiagab petak emen, go i utan. Ag agal oiagab petak emen go gusig mai dacan. Ag Uwait nugau Ze Naliupet eiman, Uwait nug ag ece naliu marabun aneun doimai, ece go wabun gumei dacanemen. Gonun, ag du tub utebi, gonug ag dabeleu naliu ebuan i keuaramau. Ag Ze Naliupet go domenin. Em gasag unum duailen ag han ze go tutak domenin. Iz Pol Uwait nugau salau du usalaimai, Ze Naliupet go duailen abai maranem.

Pol go Uwait nugau duailen isanarabun salau macaneun.

²⁴Iz ag isanarabun uhu wanemin en siksikanem. Kristus nug duailen isanarabun uhu oun. Igul go sul, duailen ag Uwait nugau salau macanemen ag uhu asiu umamen. Uwait nugau duailen ag Kristus nugau enib. Iz ag isanarabun uhu wai, iz uhu asiu go unum iboraimai, oligwamoro. ²⁵Iz Uwait nugau duailen agal salau du usalemin, einen, Uwait nug iz agal salau marabun tapai mileun. Izal salau go ag duailen isanarabun Uwait nugau Ze unum abai marai. ²⁶Getal Uwait nugau Ze go bigeg wageimai dareun. Ze go getalan duailen ag i abiu. Bo, ulis ze go koli Uwait nug duailen agal oiagab petak emen ebalagab araog meun. ²⁷Uwait nug gonugau dabeleu eim sag gonugau ze wageimai meun emgasag ipal ebuan duailen ag naliupet usalabun abai mareun. Ze go wageimai dareun gonugau bigeg enai: Kristus go ag oiagab petak emen duailen abai dareu, gonun, ag abiu aiu ses Mesgai wag ag go dual wanimag al banou mui umamen.

²⁸Gonun, ig Kristus en duailen awaranem. Uwait nug ig dabeleu naliu migena, ig duailen unum Uwait nugau Ze abai maranem. Ig ag igul naliu guzenabun awaranem. Duailen unum Kristus en oiagab petak emen, ig ag Uwait nugau ameg ebu naliupet dabun imarai alabun guzenanem. ²⁹Igul

go guzenabun iz Kristus nug gusig banou mileun, gonun, go gonugau salau mai darem. Iz go guzenabun salau gusig pet macanem.

2 ¹Iz ag isanarabun salau gusig banou mai darem abe mabun en awarem. Iz Laodisia uzanan duailen han isanarabun salau gusig mai darem. Duailen ipal ag izal aip i pianemen, iz ag han isanarabun salau mai darem. ²Iz igul go guzenanem, gonun, agal oiagab gusig usalaimai, agzozou agal zaiagar en oiagab noumaimai, oiagab tutak mui gotulai damamen. Ag igul go guzenaimai, ag dabeleu naliu oimai, agal oiagab petak emen go gusig maramau. Gonun, ag Uwait nugau Ze wageimai dareun go abe mamamen. Kristus go nugtal go ze go wageimai dareun. ³Kristus ebu, Uwait nugau dabeleu naliu unum wageimai dareu. ⁴Iz ze e awarem, einen, dudu ipal agen polu ze eim ag ameag patena, agal dabeleu ze go petak aimai dabilanemen, bo, ag polu ze maranem. ⁵Iza ag abai i darem, bo, iz ag en umkoskos dabilanem. Ag igul naliu maimai, agal oiagab Kristus en petak aimai, gusig mai dacanemen, ze go domin en izal oiab siksikeu.

Ig ag Kristus dual pezai daimai, gonugau igul subantal sesamorab.

⁶Gonun, ag Yesus Kristus, go agal Dubanou Ban dabun en imaiemen. Gonun, ag go dual pezai daiban, gonugau igul tutak sesamorai dacan. ⁷Ig ag Kristus nugau ze abai maremun, ag Kristus en agal oiagab petak emen, gonun, go gusig pet patai dacan. A ginib nug em nogoug gusig pataimai, dacaneu sul, agal oiagab Yesus en petak emen go gusig patai dacan. Zau sanag gusig ebu, zau tapai dacaneu sul, ag han gusig tapai dacan. Ag igul go guzenaiban, umkoskos Uwait 'Ese-e' auran.

⁸Ag subantal dabilan. Dudu ipal agen polu ze awarebi, goagal ze sesamorian, ze go bigeg naliu tamacag. Go embigeg agal dabeleu mui, em ebuan duailen agal dabeleu. Go Kristus nugau dabeleu tam. Ag dudu goagal piagsal i dacan.

⁹Ag abiu Uwait nugau igul naliu unum Kristus nugau enib ebu darena, duailen uligemen. ¹⁰Ag Kristus nug dual awau pezai daimai, Uwait nugau ameg ebu tuguianau pet dacanemen. Kristus go gusig banou mui. Gonug dudu banban abai wes banban mui agal gumaraneu du banou dacaneu.

¹¹Ag Kristus dual pezai darena, agal animag galau go kuatemenin sul. Igul go dudu agen agal ebeag sil agal animag galau kuatemenin sul tam. Bo, Kristus nug agal igul eg ebuan imareun igul go nug agal animag galau kuatemenin sul, gonun, ag ulis getalan kasai ze nugau piu dab tam. ¹²Ag ze ziwaremenin ziwes ebu, ag Kristus dual ereg ob oug nomenin. Kristus go noumina, Uwait nugau gusig, gonugtal koli asai meun. Agal oiagab Kristus en petak emen, gonun, ag koli Kristus dual ob oug eiman wasemenin.

¹³Getal ag igul eg macanemen ebu, agal doropag noumeun sul dareun. Ag, emgasag ipal ebuan duailen, ag Uwait nugau kasai ze sesamoranemen go ag

i abiu, gonun, igul eg macanemen. Bo, ziwas go ebutal, Uwait nug ag Kristus dual awau dabun imareun. Uwait nug igual igul eg unum zilagai migeun. ¹⁴Kasai ze nug ig igul eg macanem abai migeun. Gonun, kasai ze go sikut wai meun igual iwai zaicig sul, ig gonugau piu dabun en aneun. Bo, Uwait nug igual igul eg mui kasai ze go mui oimai, a gegeulanau ebu asai maimai, oi heun. ¹⁵Kristus a gegeulanau ebu noumina, Uwait nug wes gusig a mui, em ebian duailen wanimag a mui, unum zilacareun. Uwait nug duailen unum agal ameagab ebu duailen go mui, wes mui, go gusig tamacag abai mareun.

Ig dudu agal kasai ze i sesamorab.

¹⁶Gonun, ag du tub utebi, ag ein ee mui, ze mui zebi, uligaraimai, gonug agal igul eru neneg aimai i sisiramaun. Ag du go utebi, ag Uwait ulagwag murabun ziwas ipal mui, geil awau nugau gil ebu mui, Zuda agal Imabun Ziwas mui, zobu pebi, gonug agal igul guzenanemen i sisiramaun. ¹⁷Kasai ze go dudu ag sesamoramenin, ece go aiu ses zuabun nugau dorog. Bo, Kristus alina, ece petak pet usaleun. ¹⁸Dudu ipal agen Uwait nugau tibur sag wanimag wag maranem. Dudu go agal igul en siksikaimai, guzenai awaranem, “Ag igul go guzenanemen, gonun, Uwait nug ag i imaramau.” Ag enai ze doimai, petak aimai i dabilan. Dudu go agen ig wanimig wag tamacag anem, bo, ag ein igul wabil ebu uligemen ze asiu maimai, ag en siksikaimai, agal wanimag wag macanemen. Bo, agal dabeleu naliu tam, go dudu agal dabeleu sag, Uwait nugau dabeleu tam. ¹⁹Dudu go ag agtal Kristus dual pezai dab tam. Kristen duailen ag Kristus nugau enib sul. Kristus go gagaliag sul. Kristus nug gonugau enib gumena, tutak dacaneu. Agzozou isa isanarena, gonugau enib gusig maimai, naliu dacaneu. Gonun, gonugau enib go Uwait nugau dabeleu tutak sesamoraimai, naliu banou macaneu.

²⁰⁻²¹Ag Kristus dual noumaimai, em e ebian igul eg utemenin. Gonun, ag einen em ebian duailen sul koli em e ebian kasai ze sesamorabun aimai guzenanemen? Ag einen kasai ze enai sesamoramen: “Ag ee go i zan.” “Ag ze go i zan.” “Ag ece go i patan”? ²²Kasai ze gonug em e ebian ece en aneun, ece go unum tamamam. Kasai ze go dudu agal dabeleu abai maranemen, gonun, dai dai, kasai ze go unum kaicamam. ²³Ig kasai ze go dabeleu naliu eiman usaleun aimai dabilanem. Bo, kasai ze go dudu agtal mina, duailen sesamoraimai, zobu piabun aimai salau gusig macanem. Agtal agal wanimag wagemanem, ag agal enimag ebu uhu asiu macanemen. Agal dabeleu ebu ag guzenamamen, ag Uwait nugau ameg ebu naliu usalamam anem, bo, agal oiagab nug asai marena, ag igul eg memen kasai ze gonug isanaraimai, ag patarabun iborain tam, gonun, ag Uwait nugau ameg ebu naliu i usalamamen.

Ag Kristus dual awau damamen.

3 ¹Ag Kristus nug dual noumaimai, koli asamamen. Gonun, ag Mesgai wagan ece wabun gusig dabilan. Kristus nug go Mesgai

wag Uwait nugau ebeg naliu eiman hubabun biz ebun duailel gumarabun hobo dareu. ²Ece go Mesgai wag dareu wabun en dabeleu gusig macan. Em e ebuan ece wabun en dabeleu asiu i on. ³Ag em ebuan igul eg ebun noumemen. Uli ag Kristus nug dual awau dabun igul omen, go nug dual wageimai dareu. ⁴Agal awau dabun igul go Kristus dual pezai dareu. Gonun, Kristus koli alaba, ag han araog zoimai, go dual al banou ebun damamen.

Ig duailel awau usalemun.

⁵Gonun, ag em e ebuan igul eg unum wai aran. Go igul eg go enai, wal igul macanemen, igul eg pet ipal macanemen, agal oiagab asina, dudu ipal agal ailel abai aidabun dabilanemen, igul eg ipal mabun dabeleu asiu wanemen, dudu ipal agal esab en oiagab alanemen. Go dudu ipal agal esab en oiagab nug alaneun igul, go polu wes ulagwag macanemen sul dareu. Ag igul go unum utan. ⁶Duailel ag igul go guzenanemen, gonun, Uwait nugau aigsisilabun ziwas alai dareu. ⁷Getal ag duailel go igul eg guzenanemen sul aidaimai, ag igul go guzentel mai dacanemen.

⁸Bo, ulis agal igul eg unum uten. Igul go enai: nebicanemen, aiag sisilanemen, duailel ipal eg marabun dabilanemen, duailel ipal agal wanimag ebun ze biabial kuai macanemen, ze eg ipal maranemen. Uli, ag igul eg go unum utan. ⁹Agal muzinan igul eg utamamen. Gonun, ag agzozou polu ze i macan. Ag go don, agal muzinan igul noumeun sul dareu. ¹⁰Uli, ag igul awau ebun darenen. Ag duailel awau sul darenen. Uwait nug ag unum usalareun. Uli ag nug en abiu maimai, nug sul darenen. ¹¹Igul awau zoun, gonun, ulis emgasag ipal ebun duailel mui, Zuda duailel mui, ag ata atai tam, ag Uwait nugau ameg ebun tutak sul darenen. Dudu enimag galau kuatemenin mui, enimag galau i kuatemen mui, ag ata atai tam, ag tutak. Uzanan dudu mui, tubwagan dudu mui, ag ata atai tam, ag tutak. Salau dudu (*slev*) mui, dudu ag agtal agal salau gumanemen mui, ag ata atai tam, ag tutak. Bo, ag unum agal oiagab Kristus en petak emen, gonun, ag tutak. Kristus go ag unum abai pezai dacaneu.

¹²Gonun, Uwait nug ag gonugau duailel tapai marena, ag gonugau duailel tuguai dacanemen. Gonug ag en ougab nug noumeu. Guzenina, ag umkoskos igul naliu e guzenan. Ag duailel ipal en bisomagar piaraiban, go ebalagab igul naliu maran. Ag agtal agal wanimag wag i macan. Ag duailel ipal iau iau isanaran. Duailel go agen ag ebalagab igul eg mebi, agen han duailel go koli igul eg i maran. ¹³Ag agzozou ze alalian. Agal zaiag tub nug ag ebalagab igul eg maba, ag gonugau igul eg zilagai moron. Dubanou Ban nug agal igul eg zilagai mareun sul, agen han duailel ipal agal igul eg zilagai maran. ¹⁴Ag igul naliu e unum guzenan. Go tutak tam, ag han agal zaiagar en oiagab nug

noumamamen. Go einen, ag agal zaiagar en oiagab noumamamen, gonug ag unum oiagab tutak mui naliu gotulai damamen.

¹⁵Ag Kristus aurebi, gonugau ougab iau selanau dacanau igul go nug ag gumaraba, agal oiagab iau selanau mui damamen. Ag Uwait nugau ug tutak sul dabun ularaimai, oiagab iau selanau dabun aimai awareun. Igul go en, ag ‘Ese-e’ auramamen. ¹⁶Kristus nugau ze agal oiagab oug subantal mebi, damau. Agal dabeleu naliu nug agzozou Uwait nugau Ze abai marai marai, ag igul naliu guzenabun gusig maramamen. Ag Buk Song nugau kabal mui, zobu piabun kabal mui, kabal ipal Ah Wes nug maraneu mui kabal waimai, agal oiagab ougeim Uwait ‘Ese-e’ auramamen. ¹⁷Ag ein ze macanemen, ein salau macanemen go agal Dubanou Ban, Yesus nugau salau muranemen dabileiban, guzenamamen. Ag igul go guzenaimai, Yesus nugau wanib ebu igual memenig, Uwait ‘Ese-e’ auramamen.

Duailel agal esepagar abai suban dabun igul.

¹⁸Ailel, ag agal gamulagar agal piagsal suban dacan. Ag igul go guzenamamen, ag Dubanou Ban nugau ameg ebu igul naliu mamamen.

¹⁹Ag dudu, ag agal walagar en oiagab nug noumaimai, ag iau iau gumaraimai, goagal oiagab eg i maran.

²⁰Mogoi ainagul, agal memeagar anaiagar agal ze unum sesamoramamen. Ag igul go guzenamamen, Dubanou Ban nugau ougab ag en siksikai damau.

²¹Dudu mogoi ainagul mui, ag agal geleagar aleagar gaul ze gusig i awaran. Ag umkoskos ze gusig awarebi, go guzenai dabilamam, “Ig igul naliu tub mabun iborain tam”, gonun, goagal oiagab eg umau.

²²Salau duailel ag agal em ebuan gumaranemen dudu agal ze suban sesamoramamen. Ag agal ameagab ebu ag dudu naliu awarabun tutak, agal salau suban marab tam, bo, ag umkoskos oiagab tutak mui agal salau naliu macanemen. Igul go en, Dubanou Ban nug ougab siksikabun gonugau salau muranemen. ²³Ag ein salau mai daremen salau go oiagab siksikai mui subantal macan. Ag salau go mai darem, guzenai dabilan, “Duailel go agal salau tam, go Dubanou Ban nugau salau mai darem.”

²⁴Ag abiu agal salau eiman aiu ses Dubanou Ban nug ag koli ece naliu maramau. Gonug ein ece naliu wabun gonugau duailel awareun ece go ag maramau. Ag go don, ag igual Dubanou Ban, Kristus nugau salau oi muranemen. ²⁵Ag abiu, duailel ein igul macanem, Uwait nug guzental sisiraramau. Go igul tutak eiman duailel unum sisiraneu. Guzenina, duailel inen igul eg mamam, Uwait nug go koli uhu maramau.

4 ¹Duailel gumaranemen dudu, ag agal salau duailel agal salau erunai macanem, ece guzental suban maraiban, suban gumaramamen. Einen, ag abiu agal gumaraneu du banou nug ag gumarabun Mesgai wag dareu.

Pol nug Uwait nugau duail el igul ipal mabun awareun.

²Ag umkoskos Uwait auran. Agal dabeleu agtal suban gumeimai, Uwait nug ag subantal gumaraneu en dabeleimai, Uwait 'Ese-e' auran.

³Ziwas go ebutal, ag ig en Uwait aurebi, gonugtal abu im oitaimai, dabeleu naliu migaba, ig Kristus nugau ze getal wageimai dareun, subantal duail el awaramam. Iz ze go duail el awaranemin, gonun, dudu ipal ag ze go duabun utemen goagen iz hiacaranemen zau oug heilemen.

⁴Ag Uwait aurebi, gonug iz gonugau ze araog abai mileun sul, izan han duail el suban abai marai.

⁵Ag suban dabeleimai, duail el agal oiagab Yesus en petak ab tam ebalagab, igul naliu mamamen. Salau mabun ziwas daba, ag ziwas go gaul i sakaran, ag Kristus nugau Ze Naliupet subantal maran. Ag igul go guzenebi, duail el go agal oiagab petak abun iboin. ⁶Ag umkoskos ze naliu tutak duail el ipal isanarabun ze maramamen. Agal awarenemen ziwas ebu, ze dabeleu naliu mui marebi, duail el agen doimai, ze gonugau bigeg abe mamam. Ag guzenebi, duail el ipal agen ze kanabarebi, ag koli ein ze awarabun suban abe mamamen.

Pol nugau oligwabun ze.

⁷Tikikus nug izal salau macanem ze unum awaramau. Go igual amanig sul, iz go en oiab nug noumaneu. Go iz ibail Dubanou Ban nugau salau maimai, duail el ipal suban isanaraneu. ⁸Iz go palautoromin, ag waiagab bitamau. Gonug betei ig erunai darem ag awaramau. Iz go palautemin, gonug beteimai, agal oiagab gusig maramau. ⁹Iz Onesimus* han palautemin, Tikikus dual bitamau. Onesimus go igual zaicig, iz go en han oiab nug noumaneu, go umkoskos gonugau salau suban macaneu. Go agal uzanan. Tikikus zaug Onesimus dual agen e ebu ein igul guzenanem unum ag awaramau.

¹⁰Aristarkas go iz ibail hiacaranemen zau oug darem, gonug ag gonugau 'Kero' ze awareu. Mak go Barnabas nugau zinau gonug han ag gonugau 'Kero' ze awareu. Iz amegai ag Mak isanurabun ze palautai maremin. Go ag waiagab alaba, ag go imaiban, suban isanoron. ¹¹Yesus, gonugau wanib tub Zastus, gonug han ag gonugau 'Kero' ze awareu. Zuda dudu agal oiagab Kristus en petak emen ula ebalagab dudu ainarai go agen sag iz ibail duail el imaraimai, Uwait nugau piu dabun salau mai darem. Agen iz suban isanileimai, izal oiab gusig milemen.

¹²Eapras gonug han ag gonugau 'Kero' ze awareu. Go agal uzanan, go Yesus Kristus nugau salau du. Gonug ag en umkoskos Uwait auranu. Ag duail el banban sul gusig tapai daimai, Uwait nugau dabeleu abiu maimai, gonugau igul sesamorabun en gonug Uwait auranu. ¹³Iz go en petak pet awarem. Go ag abai Laodisia uzanan duail el mui Hierapolis uzanan

duailel mui isanarabun salau banou macaneu. ¹⁴Luk, go igual zaicig, go ebeu kasaraneu du, ig go en oigeb nug noumanem, go Demas dual han go agal 'Kero' ze ag awarem.

¹⁵Agen izal 'Kero' ze go Laodisia uzanan Kristen duailel awaran. Duailel ipal ag agal oiagab Yesus en petak anem, ag Nimpa nugau zaueim alai gotulaimai, Uwait ulagzanemen go han izal 'Kero' ze awaran. ¹⁶Ag izal agau sikut e wai maremin go nanalebi, agen han agau go palautebi, Uwait nugau duailel Laodisia uzan darem ebu bitaba, go han agau go nanalamam. Iz agau tub Laodisia uzanan duailel sikut wai maremin. Agen agau go Laodisia uzanan oi alaiban, nanalan.

¹⁷Agen Arkipus guzenai auran, "Na salau go Dubanou Ban nug mabun aizeun suban maiba, unum poen."

¹⁸Iz, Pol, izal ebesil 'Kero' ze go sikut wai marem. Iz hiacaranemen zau oug darem, ag iz en dabuiag i sikamau. Uwait gonugau ougab naliu eiman ag umkoskos isanaramau.